



Акафист святому благоверному великому князю Андрею Боголюбскому

Кондак 1

Возбранный воине Царя Небеснаго, великий княже земли Русския, избранный Господом и возлюбленный Богородицею, испроси, святе Андрее, предстоя у престола Всех Творца, да пробавит Всевлагий долготерпение свое Отечеству нашему и ниспошлет нам разум и благочестие воспети деяния славного жития твоего, да зовем ти:

Радуйся, святой благоверный великий княже Андрее.

Икос 1

Яко Ангел Бога вседержителя, свыше посланный на землю Русскую, чудно предыбранный Богоматерию быти верным строителем удела ея на земли, явился еси, святе княже Андрее, и яко достойный преемник святого Владимира равноапостольного, с ним же ныне во Отчестве Небесном соцарствуеши, прими от нас похвалы сицевыя:

Радуйся, добрый устройтелю державы Русския;

Радуйся, дерзновенный собирателю воедино
разрозненных уделов ея.

Радуйся, дивный устройтелю благолепия
церковнаго;

Радуйся, любомудренный соиздателю царствия
христианскаго.

Радуйся, храмами Бога Вышняго грады и веси
чудно красивый;

Радуйся, основание Руси Святой благочестными
делы своими укрепивый.

Радуйся, святой благоверный великий княже
Андрее.

Кондак 2

Видя Господь благочестие твое и усердие к
службам церковным, яко посещение храмов от
юности твоя усердно прилежал еси и тамо
истово в смирении сердца моления Вышнему
возносил еси, награди тя за Благоговение
многими добродетелями и мудрость монаршую
дарова ти, да возможеша право правити
народом своим и люди приводити ко спасению,
во хвалении поя Богу: Аллилуйя.

Икос 2

Разумев премудре суету жития княжескаго,
тщету и соблазны, стоящия на пути его, и
памятующе слова Писания, яко неудобь имущим
богатство во Царствие Божие внити, потщался

еси милостыню нищим и убогим раздавати,
милосердием своим умилоствляя
Всемилоствяго Бога, Иже преумножаше ти
милости Своя Небесныя, помощь свыше
Божественную посылая, да мы дивящися
вопием:

Радуйся, милосердный и милостивый
управителю народа, ти врученнаго;

Радуйся, любочестный милостыни раздаятелю
сырым и обездоленным.

Радуйся, любимый и почитаемый всеми за
велию любви ко Господу;

Радуйся, за сию любви неизреченную званием
Боголюбскаго нареченный.

Радуйся, Богославный и Боголюбимый слуго
Божий;

Радуйся, яко любви твоя ко Господу вся
превозможе

Радуйся, святой благоверный великий княже
Андрее.

Кондак 3

Слыша княже о велиих нестроениях в земли
Киевстей, о междоусобных бранех,
клятвопреступлениях, яко иде брат на брата и
сродник на сродника своего, возмутися духом и
нача молитися за Русь Святую, да избавит ю
Всемогущий и Милосердный Бог Наш от

крамолы сея, вопия выну от чистаго сердца Ему:
Аллилуйя.

Икос 3

Имеюще молитву непрестанную во уме и сердца
своём, сохраняем баше Спасителем от стрел
вражиих и копий неприятельских в битвах и
сражениих, ибо Господь храняше тя яко зеницу
ока на дела великия и славныя призывая, да
прославиши ими имя Христово, славимое
народом русским, восхваляющим тя:

Радуйся, живый в помощи Вышняго, Десницею
Его сохраняемый;

Радуйся, крилами Ангельскими незримо на всех
путях ограждаемый.

Радуйся, к познанию Христовой славы недругов
приводивый;

Радуйся, доблественне смиравый нечестивых
гордыню.

Радуйся, добропобедный военачальниче и
мужемудренный началоуправителю;

Радуйся, благочестием и молитвою к Богу
Вседержителю враги побеждавый.

Радуйся, святой благоверный великий княже
Андрее.

Кондак 4

Бурю внутрь помышлений имяше, святе Андрее,
егда не хотяше долее оставатися во стольнем

Киеве, идеже бе по повелению отца своего, но духом возгореся отъйти в родную Суждальскую землю, отец же не позволяше ти; ты же скорбя и сетуя, ночами молился еси в Вышеградстем соборе, да укажет ти Христос како подобает право ступати, взывал еси Господеви: Аллилуйя.

Икос 4

Слыша, благоговерный княже Андрее, от вышеградских жителей, яко сия чудотворная икона во храме со своего места схождаше и на воздусе среди церкви стояше, возгорелся душою еси, приемлюще сие знамение, яко благоволение Божие ти, изшед отгуду в путь свой, радуяся, неся с собою сокровище многоценное - многочудную икону Пресвятой Богородицы, дерзновенное исшествие твое прославляем, глаголюще:

Радуйся, Богодвижно исшедый из земли Киевския да зачало Руси Московстей обустроиши;

Радуйся, яко Божественный исход твой Богомати иконою Своею осеняше.

Радуйся, Богом званный на дела великия, да прославиши ими имя Господне;

Радуйся, Богоначальный царю, яко возвыси тя Вседержавный паче иных за Богопочитание твое.

Радуйся, Богомольный христианине, яко

возносимыя молитвы твоя выну слыша Господь;
Радуйся, Богом вразумляемый и
вспомоществуемый на всех стезях жития своего.
Радуйся, святой благоверный великий княже
Андрее.

Кондак 5

Яко Боготечная звезда бысть икона Богоматери
на пути шествия твоего, святе Андрее, и чудо
неизреченное от нея явися, егда отшедшу ти не
на мнозе от града Владимира, кони, везшие
икону, внезапно стаху, и никакая же сила
возможе подвигнути их с места того; ты же
повелел еси тогда молебствие Богу служити и,
припавши к образу Пречистыя, вопиял:
Аллилуйя.

Икос 5

Виде внезапно свет неизреченный, иже осия в
полунощи шатер княжеский, благоверный
Андрее, паде долу в страсе и трепете, яко узре
Самую Пресвятую Богородицу, явльшуюся ти
молящемуся, призре бо Царица Небесная на
сокрушение сердца твоего, на любовь твою ко
храмам и народу православному, и прорече ти
словеса дивныя, повелевая икону во граде
Владимире поставили и на месте сем храм во
имя Своего Рождества основати и обитель
иноком устроить, и посем молящися Пречистая

явльшемуся во облацех Господу за место сие и Русь Святую пред очами твоими, показуя промышление велие о народе своем, сего видения сподобльшемуся, князю поем:
Радуйся, истово и благогоуветливо изволение Владычицы исполнивый;
Радуйся, обитель Боголюбимую на месте явления Богоматери основавый.
Радуйся, многочудную икону Пресвятыя Богородицы написати повелевый;
Радуйся, многочисленно ю камнями драгими украсивый.
Радуйся, Боголюбивою ю наименовавый, яко возлюби Пречистая место сие;
Радуйся, яко мнози знамения и чудеса от иконы чудотворныя верным Богомати подаде.
Радуйся, святой благоверный великий княже Андрее.

Кондак 6

Проповедует доньне обитель Боголюбская чудеса деяний твоих, яко Небесное повеление Богоматери исполняя, обитель и храм во славу Пречистой на месте явления Ея воздвигл еси и икону Боголюбивую, первую писанную на Руси в память видения сего, сотворити повелел еси, яко же и доселе вси молящися пред нею с верою получают просимое, вопия в Благодарении Богу: Аллилуйя.

Икос 6

Возсия во стольнем граде Владимире святыня великая - чудотворная икона Пресвятыя Богородицы, руками святого евангелиста Луки сотворенная и твоима, княже Андрее, руками, в сей град Богохранимый принесенная и тамо во храме тобою воздвигнутом, поставленная на поклонение верным, иже и вопиют ти:

Радуйся, повеление Владычицы исполняя, многочудную икону во граде Владимире поставивый;

Радуйся, иконою Владимирскою Русь державную отныне и до века благословивый.

Радуйся, яко сия икона от дне того явися символом и покровом Руси Святой;

Радуйся, яко Богоматерь чрез Свою икону Владимирскую землю Русскую многожды от бед и напастей избавляше и сохраняше.

Радуйся, духоносный правителю, промыслом Божиим таковыя дивныя иконы Пресвятыя Богородицы Отечеству даровавший;

Радуйся, яко и донныне всем молящимся пред ними с верою, Пречистая благодать и милость Сына Своего неоскудно дарует.

Радуйся, святой благоверный великий княже Андрее.

Кондак 7

Хотяше, благоверный Андрее, земли
разрозненныя во едино царствие соединити и
еднодержавно землею русскою владети, да
богатеет и преуспеваает во славе и благочестии,
укрепляше грады и веси, всюду храмы Господни
созидаю, да прославляют в них людие имя
Божне, поя: Аллилуйя.

Икос 7

Новый Владимир - креститель земли северной
обрелся еси, Богомудрый княже, приводя люди
неверныя ко Христу Богу и церковное
благоепие преумножая, памятовал еси слова
Спасителевы: «Ищите прежде Царствия Божия и
правды его и вся сия приложитя вам» и дарова
Господь Руси вся земная, яже на потребу суть,
не посрамляя упования твоего, еже восхваляем:
Радуйся, адамантову веру, ничем
непоколебимую, в целости до смерти своея
сохранивый;
Радуйся, яко по молитве твоей к Богородице,
дванадесять человек, камением порушившимся
побиенных, невредимы обретошася.
Радуйся, благоепие церковное паче иных
красот тленного мира сего возлюбивший;
Радуйся, устройением храмов богатство тленное
на богатство вечное неоскудеваемое делы рук
своих пременивший.

Радуйся, велемудренный зодчий,
поспешествуемый силою Творца и Зиждителя;
Радуйся, велений Божиих ревностный
исполнителю.

Радуйся, святой благоверный великий княже
Андрее.

Кондак 8

Странно бысть именованым сродником твоим
чудное житие твое, яко не о славе си, но первее
о благоукрашении церковнем со всем тщанием
прилежал еси и о величин веры Христовой
ревновал еси, сего ради и ополчился на тя враг
рода человеческого со приспешники своими,
кии поношаху и клеветаху на тя, ты же по
заповеди Христовой за злохулителей своих
молился еси Богу, взывая Ему: Аллилуйя.

Икос 8

Весь отдал еси ся на служение народу, ти от
Бога врученному, покорил еси неверное царство
Болгарское под нозе войска русского,
проплавлял еси Бога, даровдвшего ти поведу
таковую, и в память сего праздник
Всемилоствиваго Спаса и Покрова Пресвятыя
Богородицы праздновати повелел еси, еже мы до
дне сего творяще, в блалгодарении вопием ти:
Радуйся, на поле брани знамение от иконы
Спасовы - сияние паче луч солнечных

изумеваяся узревый;

Радуйся, хвалу Иисусу в день победы над неверными праздновати повелевый.

Радуйся, праздник Покрова Пресвятой Богородицы Богомудренно устройый;

Радуйся, Русь Святую Покрову Божией Матери посвятивый.

Радуйся, нечестивых не силою оружия токмо, паче же милосердием покоривый

Радуйся, на служение Руси - Дому Пресвятой Богородицы все житие свое положивый.

Радуйся, святой благоверный великий княже Андрее.

Кондак 9

Всяким добродетелем причастен явился еси, свят и праведен в житии обретыйся своим, сего верою укрепляемый вся напасти за вся яже ниспосла ти Господь, благодарил еси Создателя нашего, в испытаниях и печалях укрепившаго и в милости Своея обильно тя одарившаго. Тем же просим тя: нам сицевыя искушения претерпети и веру непоколебиму сохранить даже до кончины своей, молящися Подвигоположнику Богу: Аллилуйя.

Икос 9

Ветия мира сего недоумеваху, святе Андрее, како не любил еси застолий княжиих и пиров

дружинных, уединяся в Боголюбове, покоях своих и тамо моляся, тако и сынов своих во благочестии и страсе Божием возрастил еси, яко овы убо на поле брани за Веру и Отечество погибоша; един же, скончавшись в возрасте юношестем, в лице святых обретеса, таковаго родителя почитающе восхваляем:

Радуйся, ибо плоды доброрасленны древа многоплоднаго сыны твоя обретошася;

Радуйся, яко нетленные мощи сына твоего Глеба славу твою, яко отца его преумножают.

Радуйся, яко чада твоя прежде тя в Горний Иерусалим предъидоша да место упокоения ти уготовають;

Радуйся, отец любвеобильный, бывый не токмо чадом по плоти, но всем людем Царствия твоего.

Радуйся, яко мнози невернии и нечестивни, зряще благочестное житие твое, во Христа крестишася;

Радуйся, яко оныя ныне сорадуются ти во Царствии Небесном Царю Небесному, яко верныя сыны царя земнаго.

Радуйся, святой благоверный великий княже Андрее.

Кондак 10

Спасти хотя душу свою, не устранился еси злых наветников, иже замыслиша убитьи тя, токмо вопиял еси убийцом твоим: «Что вам зло

сотворих или за кое дело заколаете мя, Горясеру, наемнику Святополкову, подобящеся», мы же, сия ныне поминающе, княже-страстотерпче, восхваляем Подвигоположника Христа, Укрепившего тя в час смертный, воспевая Ему: Аллилуйя.

Икос 10

Стеная и вопия, сшел еси по лестнице долу и спряташеся в нише столпа восходнаго, истекая кровию от лютых ран и язв, ихже злочестивии ти нанесоша, тщался еси стражу на помощь себе призвати, но услышали глас твой, убийцы окаянные и нашедшу тя, отсекоша ти шуйцу твою, немилостивно удары секирам и мечи наносяще ти удары смертныя, и тако прикончиша тя; ты же с молитвою на устех душу чистую Господу Живодателю предал еси, страдания твоя восхваляюще, зовем:

Радуйся, во испытаниях своих веру крепку, яко Авраам, явивый;

Радуйся, в злостраданиях терпение твердое, яко Иов, показавый;

Радуйся, не суетному унынию, но Божьему благоволению себе предавый;

Радуйся, от лжебратии преданный, жестоко умученный и убиенный.

Радуйся, землю Боголюбимой обители святою кровию обогривший.

Радуйся, житием своим землю Русскую прославивший;
Радуйся, святой благоверный великий княже Андрее.

Кондак 11

Пение Богу и Пресвятей Богородице донныне приносим, княже, во храмах, тобою воздвигнутых, памятующе слова Писания, тобою на деле исполненныя: "Стяжите себе сокровище на Небеси, идеже ни тля тлит и татие не подкопывают и не крадут"; стяжал еси себе, святе Андрее, сокровище таковое, имже нас грешных обогощаеши, молящихся Богу, ты прославившему : Аллилуйя.

Икос 11

Светозарный луч света Божественнаго осени все житие твое, и чаяния славных деяний твоих сбышася послежде над Церковню и Отечеством, егда крамолы княжая престаша и воцарися царь един на Руси. Мы же молим тя, святе княже Андрее, молися и ныне Всещедрому Богу, да ниспошлет благодать покаяния всем заблудшим чадам небеснаго Отца и от греха к отеческому дому востекших, укрепит веру истинную в державе земной твоей, и да восстановит престол царей христолюбивых, зовем ти:
Радуйся, стольный град Владимир, осеняемый

милостию Богородицы, благогоустроивый и благоукрашивый;

Радуйся, славу государства Московскаго прозорливо прознаменовавший.

Радуйся, Богом призванный на служение царское;

Радуйся, приснопеваемый устройтелю державы Русския.

Радуйся, к Богопознанию приводящий;

Радуйся, к свету истины прельщенные обращающий.

Радуйся, страх Божий в сердца вселяющий

Радуйся, святой благоверный великий княже Андрее.

Кондак 12

Благодать истекает от мощей твоих, яко всем приходящим к раце твоей, подаеши просимое, сего ради молим: не остави державы твоя и живущих в ней, не престай молиться за весь мир христианский, да вопиют выну вси Всемогущему Богу: Аллилуйя.

Икос 12

Поюще всесвятую память твою, княже Андрее, прославляем и императора Николая, в день сей страдания Христа ради приявшего, ибо яко Господь Превечен сый, Начаток и Конец, все сущее и созданное в руце Своей выну

Содержащий, тако и вы, царие святии, житием своим и кончиною мученическою Господа прославившия, яко первый и последний царство русское, яко царство Божие на земли, промыслом Вышняго увенчали есте, сего ради мы грешныя, дивящися неизследимым судьбам Божиим, вопием:

Радуйся, яко первым царем некоронованным государства Русскаго от потомков своих наименован бяше.

Радуйся, деннонощно моливыйся о благоденствии Отечества земнаго и по преселении во Отечество Небесное не оставивый молитвы своея о нас.

Радуйся, правителей, яко слуг Божиих, поставляяй

Радуйся, судиям и адвокатом святое зеркало правды открываяй

Радуйся, сущих во власти к торжеству добра направляющая.

Радуйся, Святителей правилом веры и образом благочестия украшаяй;

Радуйся, святой благоверный великий княже Андрее.

Кондак 13

О, святой великий княже-страстотерпче Андрее, и ныне не оставляй предстательством народа своего и земли Русстей, молися спастися нам,

потомкам подданных твоих и Царствия
Небеснаго достигнути, идеже ты с прочими
святыми князи и цари и всеми от века
праведными чина всякаго, вопиешу к Богу в
нескончаемей славе: Аллилуйя, Аллилуйя,
Аллилуйя. Сей Кондак глаголи трижды, посем
Икос 1 и Кондак 1.

Молитва

О, святой благоверный великий княже Андрее!
Страстотерпче и мучениче! Слуго Божий верный
и Богославный, христианине истовый и
Богоревнивый, муже любодобродетельный и
Богомудрый, воине всечестный и воеводо
доброхвальный, монарше Богоизбранный и
Боголюбимый, правителю державный и
дерзновенный! Русь Святую, на уделы и
княжества разобщенную, хотевый во едино
царствие собрати и единоподдержавно ею правити,
да непреоборима от враг истиннаго
христианства пребудет; за сии деяния во славу и
честь Бога Христианского убиенный и кровию
своею основание Руси Святой с прочими князи-
мученики укрепивший, да во век незыблема
пребудет; даровавший Руси многочудныя иконы
Богоматери и Тою паче многих иных за
Благочестие и Богопочитание возлюбленный.
Сыновей возрадивший, иже ты, отца земнаго

своего, житием своим и Отца Небеснаго
кончиною своею прославиша. Обитель
Боголюбивую основавый и мнози храмы
воздвигнувый, в них же доселе молящися мы,
грешнии, просим твоего предстательства и
Небесныя помощи; испроси, святе Андрее, у
Господа Вседержителя милости богатыя
обездоленному царствию русскому и отпущения
многих и тяжких грехов народам христианским,
да дарует Спаситель нам правителя тебе
подобнаго, иже возмогл бы возродити
Отечество наше земное и ко Отечеству
Небесному привести нас, идеже ты ныне, княже,
во славе Невечернаго Света предстоя со всеми
святыми, восхвалявши в Троице славимаго Бога
Отца и Сына и Святаго Духа, ныне и присно и
во веки веков. Аминь.

